

Na osnovu člana 4. stav 1. tačke. 9 i 14. i stava 2. Zakona o komunalnim djelatnostima («Službene novine Kantona Sarajevo», br. 31/04 i 21/05-ispravka) i čl. 22 i 24. stav 1. Zakona o Vladi Kantona Sarajevo ("Službene novine Kantona Sarajevo", broj 24/03 - prečišćeni tekst), Vlada Kantona Sarajevo na ___ sjednici _____ 2010 godine, donijela je

P R E D N A C R T

U R E D B U
O UPRAVLJANJU I ODRŽAVANJU GROBALJA
I OBAVLJANJU POGREBNIH DJELATNOSTI

I – OPĆE ODREDBE

Član 1.
(Predmet Uredbe)

Ovom uredbom bliže se propisuje način i uslovi upravljanja i održavanja grobalja, pratećih objekata i infrastrukture, uređivanje i održavanje grobnih mjesta i nadgrobnih spomenika, način i uslovi ustupanja i korištenja grobnih mjesta, vođenje i sadržaj evidencije, preuzimanje, zbrinjavanje, opremanje i prevoz umrlih lica do objekta mrtvačnice, mrtvačnica i poslovi u mrtvačnici, ispraćaj i sahrane umrlih lica, ekshumacije posmrtnih ostataka, prateće usluge, izvori sredstava za obavljanje djelatnosti, nadzor, kaznene i završne odredbe.

Član 2.
(Definicija groblja)

Groblje je ograđeni prostor zemljišta na kojem se nalaze grobna mjesta, prateće građevine i komunalna infrastruktura.

Član 3.
(Prateće građevine)

Pratećim građevinama u smislu ove uredbe smatraju se mrtvačnice, prostorije za izlaganje na odar i ispraćaj umrlih, komemorativni centar, prostorije grobnog ureda, cvjećara, sanitarne prostorije i prostorije za radnike.

Član 4.
(Infrastruktura grobalja)

Infrastrukturu u smislu ove uredbe smatraju se putevi, staze, stepenice, platoi, vodovodna mreža, kanalizaciona mreža, drenažna mreža, rigoli, elektro instalacije, dekorativne fontane, ograde, parkovske klupe, korpe za smeće, ulična rasvjeta, razglasni uređaji, ukrasno grmlje, drveće i sezonsko cvijeće.

Član 5.
(Otvorena i zatvorena groblja)

- (1) Groblja na području Kantona Sarajevo se dijele na otvorena i zatvorena groblja.
- (2) Pod otvorenim grobljima podrazumijevaju se groblja u upotrebi odnosno, groblja određena za vršenje ukopa.
- (3) Pod zatvorenim grobljima podrazumijevaju se groblja izvan upotrebe, u kojima nema mogućnosti za vršenje ukopa zbog prostornih, sanitarnih ili drugih razloga.

Član 6.
(Otvorena groblja)

- (1) Otvorena groblja na području Kantona u kojima se vrši ukop su:
- a) Groblje Bare,
 - b) Groblje Lav,
 - c) Groblje Stadion,
 - d) Groblje Sveti Josip,
 - e) Groblje Sveti Marko,
 - f) Groblje Sveti Arhanđeli Georgije i Gavriilo,
 - g) Groblje Sveti Mihovil,
 - h) Groblje Obad,
 - i) Groblje Vlakovo.
- (2) Vlada Kantona Sarajevo, u izuzetnim slučajevima kada to nalažu običaji, može dozvoliti sahranjivanje i u drugim grobljima, koja nisu navedena u stavu 1. ovog člana.

Član 7.
(Zatvorena groblja)

- (1) Zatvorena groblja čije održavanje obezbjeđuje Kanton Sarajevo su:
- a) Pravoslavno groblje Alipašino polje,
 - b) Rimokatoličko groblje Stup,
 - c) Pravoslavno groblje Stup,
 - d) Harem Humka,
 - e) Harem Budakovići gornji,
 - f) Harem Budakovići donji,
 - g) Harem Vrbanjuša,
 - h) Harem Čurčica,
 - i) Harem Alifakovac,
 - j) Harem Bakarevića,
 - k) Groblje Rosulje-Vogošća,
 - l) Pravoslavno groblje Blažuj-Vrelo Bosne,
 - m) Pravoslavno groblje Briješće,
 - n) Harem Himzarina,
 - o) Harem Budakovići ispod ulice Vareška,
 - p) Harem Budakovići iznad ulice Vareška,
 - q) Harem Logavina donja,
 - r) Harem Kovači između ulice Ploča i Širokac,
 - s) Harem Kovači pored ulice Ploča,
 - t) Harem turbe Bistrik,
 - u) Harem Podtakiša,
 - v) Harem Mali Hrvatin,
 - z) Harem Ugorsko-Vogošća,
 - aa) Harem Trebečaj-Trnovo,
 - bb) Harem Ostojići-Trnovo,
 - cc) Harem Delijaš-Trnovo,
 - dd) Harem Šabići-Trnovo,
 - ee) Harem Dejčići-Trnovo,
 - ff) Harem Grlića brdo,
 - gg) Harem Hambina carina,
 - hh) Pravoslavno groblje Prvomajska,
 - ii) Harem Toka Džeka,

- jj) Rimokatoličko groblje-Tarčin,
- kk) Rimokatoličko groblje Podgora I-Ilijaš,
- ll) Pravoslavno groblje Podgora I-Ilijaš,
- mm) Muslimansko groblje Stari Ilijaš-Ilijaš,
- nn) Harem Hendek,
- oo) Harem Jarčedoli,
- pp) Kovaći Hrasnica,
- rr) Jevrejsko groblje.

Član 8.

(Povjeravanje na upravljanje i održavanje grobalja)

- (1) Upravljanje grobaljima iz člana 6. i održavanje grobalja iz člana 7. ove uredbe, obezbjeđuje Kanton Sarajevo.
- (2) Upravljanje i održavanje grobalja iz stava 1. ovog člana povjerava se pravnom licu koje ispunjava propisane uslove za obavljanje ove djelatnosti (u daljem tekstu: «Upravitelj»).
- (3) Održavanje ostalih zatvorenih grobalja obezbjeđuju Grad i općine na području Kantona Sarajevo, svako u okviru svojih nadležnosti, putem pravnog lica registrovanog za obavljanje ove djelatnosti.
- (4) Upravljanje i održavanje grobalja šehida i poginulih boraca reguliše se posebnim propisima.

Član 9.

(Otvaranje, proširenje i zatvaranje grobalja)

Odluke o izgradnji novih, odnosno proširenju postojećih grobalja i zatvaranju grobalja donosi Skupština Kantona Sarajevo.

II – UPRAVLJANJE, UREĐIVANJE I ODRŽAVANJE OTVORENIH GROBALJA, PRATEĆIH OBJEKATA I INFRASTRUKTURE

Član 10.

(Upravljanje otvorenim grobljima)

Upravljanje otvorenim grobljima podrazumijeva: uređivanje i održavanje grobalja, grobnih mjesta i infrastrukture, ustupanje grobnog mjesta, preuzimanje i zbrinjavanje umrlog lica u objekat mrtvačnice, odnosno groblja, organizovanje ispraćaja i sahrane umrlog lica, ekshumiranje posmrtnih ostataka, obezbjeđenje cvijeća, svijeća i vijenaca, osiguranje trajnog i kvalitetnog obavljanja djelatnosti, preduzimanje mjera za očuvanje zaštite okoliša, osiguranje javnosti i transparentnosti rada i druge sadržaje primjerene ovoj djelatnosti.

Član 11.

(Uređivanje i održavanje otvorenih grobalja, pratećih objekata i infrastrukture)

Uređivanje i održavanje otvorenih grobalja, pratećih objekata i infrastrukture podrazumijeva: uređivanje i održavanje travnjaka, ukrasnog grmlja i sezonskog cvijeća, drveća, staza, platoa, stepenica i rigola, kupljenje i odvoz smeća i viška zemlje, čišćenje snijega i sprečavanje poledice, održavanje vodovodne i kanalizacione infrastrukture, drenažne i elektro instalacije, održavanje ograde, održavanje dekorativnih fontana, parkovskih klupa, korpi za smeće, ulične rasvjete i razglasnog uređaja, uređenje i održavanje prostorija mrtvačnice, uređenje i održavanje prostorija za izlaganje na odar i ispraćaj umrlog, uređenje i održavanje prostorija grobnog ureda i uređenje i održavanje prostorija za radnike i uređenje i održavanje sanitarnih prostorija.

Član 12.
(Način upravljanja)

Upravljanje grobljem treba obavljati na način kojim se iskazuje poštovanje prema umrlim licima koja su u njemu sahranjena.

**III – UREĐIVANJE I ODRŽAVANJE GROBNOG MJESTA I
NADGROBNOG SPOMENIKA**

Član 13.
(Uređivanje i održavanje grobnog mjesta i nadgrobnog spomenika)

- (1) Uređivanje i održavanje grobnog mjesta i nadgrobnog spomenika vrše srodnici i druga zainteresovana lica.
- (2) Uređivanje i održavanje grobnog mjesta sastoji se u: održavanju zasađenog cvijeća i ukrasnih grmova, održavanju rubnog travnjaka, košenju trave, uklanjanju suvih biljnih i drugih otpada, održavanju nadgrobnih oznaka, održavanju posuda za cvijeće i svijeće.
- (3) Uređivanje i održavanje nadgrobnih spomenika sastoji se u: održavanju kamenih i betonskih dijelova spomenika, održavanju tekstova, slika i drugih obilježja na spomeniku i održavanje neposrednog prostora oko spomenika.
- (4) Grobovi koji su proglašeni spomenicima kulture, održavaju se u skladu sa propisima o zaštiti spomenika kulture.

Član 14.
(Pismeno upozorenje)

Ako lica iz predhodnog člana ne uređuju, odnosno ne održavaju grobno mjesto i nadgrobnni spomenik, «Upravitelj» će ih na to pismeno upozoriti i odrediti rok za izvršenje navedene obaveze, koji ne može biti kraći od 15 dana.

Član 15.
(Izgradnja i postavljanje nadgrobnih spomenika i znakova)

- (1) Izgradnja nadgrobnih spomenika i postavljanje nadgrobnih znakova na groblju vrši se u skladu sa projektnim rješenjem po odobrenju «Upravitelja».
- (2) O obliku i materijalu nadgrobnih spomenika i nadgrobnih znakova odlučuju srodnici i druga zainteresovana lica, s tim da se nadgrobnni spomenici i nadgrobnni znakovi po dimenzijama i načinu izrade uklapaju u urbanističko rješenje groblja.

Član 16.
(Uklanjanje i prepravlanje nadgrobnih spomenika)

- (1) Nadgrobnni spomenici mogu se uklanjati sa groblja ili prepravljati samo na osnovu pismenog odobrenja «Upravitelja».
- (2) «Upravitelj» će izdati odobrenje iz predhodnog stava, samo ako se radi o poboljšanju, popravci ili zamjeni za drugi spomenik veće umjetničke vrijednosti i ako se uklapa u urbanističko rješenje.
- (3) Zabranjeno je izvođenje radova u blizini grobnog mjesta u vrijeme određeno za obavljanje sahrane.

Član 17.

(Izvođenje radova na izgradnji nadgrobnih spomenika)

- (1) Radove na izgradnji nadgrobnih spomenika mogu vršiti samo lica koja su registrovana za obavljanje te djelatnosti.
- (2) Lica iz predhodnog stava dužna su da prije izvođenja radova sa «Upraviteljem» zaključe pismeni ugovor o izvođenju radova.
- (3) Poslove izrade armirano-betonskog temelja za nadgrobnni spomenik do nivoa površine zemlje, kao i popločavanje staze kulir-pločama oko nadgrobnog spomenika, vrši samo «Upravitelj» uz odgovarajuću naknadu.
- (4) Za vrijeme obavljanja radova zabranjeno je ostavljati materijal na mjestu izvođenja radova.

Član 18.

(Saglasnost za postavljanje natpisa i znakova)

- (1) Zabranjeno je na nadgrobnne spomenike i znakove stavljati natpise kojima se vrijeđa bilo čiji nacionalni, patriotski ili vjerski osjećaj i pijetet prema umrlom.
- (2) «Upravitelj» je dužan, na osnovu rješenja nadležnog organa, ukloniti natpise iz stava 1. ovog člana.
- (3) Natpisi na nadgrobnim spomenicima i znakovima podliježu saglasnosti «Upravitelja».

Član 19.

(Uklanjanje vijenaca i cvijeća sa grobnog mjesta)

- (1) «Upravitelj» je dužan da u roku od 40 dana od dana ukopa, ukloni i odnese na deponiju položene vijence i cvijeće, izuzev svježe položenog cvijeća i vijenaca, sa grobnog mjesta gdje je obavljena sahrana.
- (2) Zabranjeno je vršiti spaljivanje cvijeća i vijenaca na groblju.

Član 20.

(Prekopavanje grobnog mjesta ili grobnice)

- (1) Grobno mjesto ili grobnica može se prekopati po isteku deset godina u slučaju da se grobno mjesto ili grobnica ne održava ili ne plaća godišnja naknada.
- (2) Ukoliko zainteresovano lice uredi grobno mjesto ili grobnicu i izmiri godišnju naknadu za korištenje prije prekopavanja, prekopavanje se neće vršiti.
- (3) Prekopavanje grobnog mjesta ili grobnice vršiće se u skladu sa odredbama člana 21. stava 2.

Član 21.

(Odluka o prekopavanju grobnog mjesta i prenošenju posmrtnih ostataka)

- (1) Po isteku roka iz člana 20. stav 1. posmrtni ostaci iz pojedinih grobnih mjesta mogu se prenositi u zajedničko grobno mjesto ili grobnicu.
- (2) Odluku o prekopavanju grobnog mjesta i prenošenju posmrtnih ostataka donosi Vlada Kantona Sarajevo, a na prijedlog «Upravitelja».
- (3) Prekopavanje, odnosno prenošenje posmrtnih ostataka ne može se izvršiti prije isteka dva mjeseca od objavljivanja Odluke u ““Službenim novinama Kantona Sarajevo” i jednom od dnevnih listova dostupnih najmanje na teritoriji Federacije Bosne i Hercegovine.
- (4) Nakon prenošenja posmrtnih ostataka grobno mjesto će se prekopati.

Član 22.

(Ustupanje grobnog mjesta ili grobnice)

- (1) Rezervisano grobno mjesto ili grobnica može se ustupiti drugom zainteresovanom licu po isteku tri godine od neplaćanja godišnje naknade «Upravitelju» i neodržavanja grobnog mjesta ili grobnice.
- (2) Ukoliko rezervisano grobno mjesto ili grobnicu zainteresovano lice uredi i izmiri godišnju naknadu prije ustupanja, grobno mjesto se neće ustupiti drugom zainteresovanom licu.
- (3) Ustupanje se ne može izvršiti drugom zainteresovanom licu prije isteka dva mjeseca od objavljivanja saopštenja u «Službenim novinama Kantona Sarajevo» i jednom od dnevnih listova dostupnih najmanje na teritoriji Federacije Bosne i Hercegovine.

IV – NAČIN I USLOVI USTUPANJA I KORIŠTENJA GROBNOG MJESTA

Član 23.

(Ustupanje grobnog mjesta)

- (1) «Upravitelj» je dužan da na zahtjev zainteresovanog lica ustupi na korištenje grobno mjesto.
- (2) Ustupanje na korištenje grobnog mjesta iz predhodnog stava vršiće se i prije nego što je nastala potreba za sahranom.
- (3) «Upravitelj» za ustupljeno grobno mjesto iz stava 2. ovog člana izdaje rješenje u kojem se mogu navesti i druga lica sa pravom korištenja grobnog mjesta.

Član 24.

(Vrsta grobnih mjesta i grobnica)

Grobna mjesta odnosno grobnice mogu biti odvojene (pojedinačne), povezane (porodične grobnice) i kolektivne (žrtve zemljotresa, epidemije, i sl.).

Član 25.

(Duplo i trojno ukopavanje)

«Upravitelj» će odobriti sahranjivanje dva ili više umrlih lica u isti grob (duplo ili trojno ukopavanje), ako takvu sahranu zahtjeva srodnik umrlog ili zainteresovano lice i ako to terenski uslovi omogućavaju.

Član 26.

(Dubina grobnog mjesta)

Dubina grobnog mjesta za jedno lice (obično kopanje) je 130 cm, za dva lica (duplo kopanje) je 180 cm, za tri lica (trojno kopanje) je 210 cm.

Član 27.

(Pravo korištenja grobnog mjesta)

Pravo na sahranu u ustupljeno grobno mjesto, odnosno grobnicu ima ugovorna strana, njeni bliski srodnici i druga lica navedena u rješenju o pravu korištenja grobnog mjesta.

Član 28.
(Pojam bliski srodnika)

- (1) Pod bliskim srođnicima podrazumijevaju se:
- a) braćni drug,
 - b) srođnici u prvom nasljednom redu, braća i sestre,
 - c) braćni drugovi lica iz tačke 2. ovog člana.

Član 29.
(Spor o pravu korištenja grobnog mjesta odnosno grobnice)

Ako o pravu korištenja grobnog mjesta, odnosno grobnice ili o načinu njihove upotrebe dođe do spora između zainteresovanih lica, «Upravitelj» će zabraniti upotrebu takvog grobnog mjesta dok se ne riješi spor nagodbom ili putem nadležnog suda.

Član 30.
(Naknada za grobno mjesto odnosno grobnicu)

- (1) Za korištenje i ustupljeno grobno mjesto, odnosno grobnicu zainteresovano lice plaća godišnju naknadu.
- (2) Grobno mjesto, odnosno grobnica za koje godišnja naknada nije plaćena deset godina, smatra se napuštenim i može se ponovo dodijeliti na korištenje.
- (3) «Upravitelj» je dužan prije dodijele grobnog mjesta odnosno grobnice drugom korisniku premjestiti ostatke umrlih iz napuštenog groba u zajedničku grobnicu izgrađenu za tu namjenu.

Član 31.
(Ustupanje grobnog mjesta odnosno grobnice trećim licima)

Korisnik može korištenje grobnog mjesta odnosno grobnice ugovorom ustupiti trećim licima. Ugovor o ustupanju tog korištenja mora se dostaviti «Upravitelj», radi upisa novog korisnika u grobni ured.

Član 32.
(Prenos vlasništva na nadgrobni spomenik)

Nadgrobni spomenik izgrađen na grobnom mjestu smatra se nekretninom. Ako se uz ustupanje grobnog mjesta prodaje ili na drugi način prenosi vlasništvo nadgrobni spomenika, novi korisnik grobnog mjesta dužan je uz ugovor o ustupanju priložiti i dokaz o uplaćenom porezu na promet te nekretnine ili oslobađanju od obaveze plaćanja.

V – EIDENCIJE KOJE VODI UPRAVITELJ

Član 33.
(Evidencija i njihov sadržaj)

«Upravitelj» je dužan voditi evidenciju o ukopu svih osoba na području Kantona Sarajevo, o rezervisanim grobnim mjestima i održavanju i naplati godišnje naknade za ustupljeno grobno mjesto, o izvršenim ekshumacijama, o izgrađenim armirano-betonskim temeljima i popločavanju staza oko spomenika.

Član 34.

(Sadržaj evidencije o ukopu lica)

- (1) Matični podaci za ukop umrlog-le mora da sadrži:
 - a) (1) Podatke o umrlom-oj,
 - b) (2) Podatke o podnosiocu prijave za ukop umrlog-le,
 - c) (3) Podatke za sahranu/dženazu umrlog-le,
 - d) (4) Podatke o grobnom mjestu,
 - e) (5) Ostale podatke relevantne za ukop umrlog-le,
 - f) (6) Vrstu pogrebne opreme.

- (2) Evidencija o ukopu lica mora da sadrži:
 - a) datum najave sahrane,
 - b) na kojem je groblju sahrana,
 - c) koja pogrebna oprema,
 - d) ime i prezime,
 - e) imena roditelja,
 - f) ime bračnog druga,
 - g) godinu rođenja,
 - h) mjesto rođenja,
 - i) zanimanje,
 - j) mjesto sa adresom stanovanja,
 - k) mjesto i datum smrti,
 - l) uzrok smrti,
 - m) mjesto, adresa i broj telefona osobe koja je najavila sahranu i koja će brinuti o grobnom mjestu,
 - n) datum i vrijeme sahrane,
 - o) parcela, red i grobno mjesto sahrane,
 - p) podatke o izvršenoj rezervaciji ili ranije sahranjenoj osobi gdje se vrši ukop,
 - r) podatke o izgrađenom nadgrobnom spomeniku,
 - s) podatke o dubini sahrane (obično, duplo, trojno),
 - t) podatke o uplaćenju godišnjoj taksi uz sahranu,
 - u) potpis osobe koja je uzela podatke, nalog izvršila i u kartoteku zavela.

Član 35.

(Sadržaj evidencije o rezervisanim grobnim mjestima)

- (1) Evidencija o rezervisanom grobnom mjestu mora da sadrži:
 - a) datum ustupanja rezervacije,
 - b) na kom groblju je rezervacija,
 - c) ime, prezime, mjesto, adresa i broj telefona osobe kojoj je ustupljena rezervacija,
 - d) parcelu, red i grobno mjesto rezervacije.

Član 36.

(Sadržaj evidencije o ekshumiranju posmrtnih ostataka)

- (1) Evidencija o ekshumiranju posmrtnih ostataka pored evidencije iz člana 34. ove Uredbe mora da sadrži i:
 - a) na kom groblju, parceli, redu i grobnom mjestu se vrši ekshumacija,
 - b) na čiji zahtjev se vrši ekshumacija,
 - c) datum i vrijeme ekshumacije.

Član 37.

(Sadržaj evidencije o izradi armirano-betonskih temelja i popločavanju)

- (1) Evidencija o izradi armirano-betonskih temelja i popločavanju kulir ploča mora da sadrži:
- a) datum narudžbe,
 - b) naziv izvođača radova iznad površine zemlje,
 - c) ime i prezime osobe koja plaća,
 - d) groblje, parcelu, red, grobno mjesto sa imenom sahranjenog ili rezervisanog grobnog mjesta gdje se vrši izrada.

Član 38.

(Sadržaj evidencije o naplati naknade za grobno mjesto)

- (1) Evidencija o održavanju i naplati godišnje takse za grobno mjesto mora da sadrži:
- a) ime i prezime osobe koja održava i plaća,
 - b) do kada je naplaćena godišnja taksa.

Član 39.

(Posljedice neodržavanja i neplaćanja naknade)

U slučaju da se grobno mjesto ne održava i ne plaća godišnja naknada «Upravitelj» vrši radnje shodno članu 20. i 21. ove uredbe.

Član 40.

(Čuvanje evidencija)

Evidencije iz čl. 33. 34. 35. 36. 37 i 38. moraju se pohraniti i trajno čuvati.

VI - ZATVORENA GROBLJA

Član 41.

(Održavanje zatvorenih grobalja)

- (1) Održavanje zatvorenih grobalja se vrši u skladu sa urbanističkim, tehničkim i sanitarnim uslovima.
- (2) Zatvorena groblja koja imaju obilježja parkovske površine, održavaju se u skladu sa propisima koji regulišu održavanje javnih površina u skladu sa Zakonom o komunalnim djelatnostima («Službene novine Kantona Sarajevo», br. 31/04 i 21/05-ispravka).

VII – PREUZIMANJE, ZBRINJAVANJE, OPREMANJE I PREVOZ UMRLOG LICA DO OBJEKTA MRTVAČNICE I GROBLJA

Član 42.

(Preuzimanje, prevoz i zbrinjavanje umrlog lica)

- (1) «Upravitelj» ili «Pravno lice» na poziv srodnika i zainteresovanih lica dužan je preuzeti prevesti i u centralnu mrtvačnicu, koja je sastavni dio groblja, zbrinuti umrlog u roku od tri sata od sata prijave, odnosno od sata obavjesti o utvrđivanju smrti sa upisom identiteta u jedinstvenu knjigu umrlih koju vodi osoblje centralne mrtvačnice.
- (2) Preuzimanje i prevoz umrlog lica sa mjesta smrti do centralne mrtvačnice isključivo vrši «Upravitelj», koji mora posjedovati specijalna vozila za ovu najmanju.

- (3) Prevoz umrlog lica iz stava 2. ovog člana, kao i prevoz na otvorena groblja kojima «Upravitelj» gazduje, «Upravitelj» je dužan vršiti bez naknade.
- (4) Prevoz umrlog lica od centralne mrtvačnice do groblja na području Kantona Sarajevo vrši «Upravitelj».
- (5) «Upravitelj» je dužan svih 24,00 sata u toku dana da u centralnoj mrtvačnici obezbijedi dovoljan broj lica i specijalnih pogrebnih vozila za vršenje službe.

Član 43.
(Mrtvačnica)

- (1) Centralna mrtvačnica za potrebe Kantona Sarajevo nalazi se u sastavu otvorenog groblja «Bare».
- (2) Mrtvačnica mora da se sastoji od:
 - a) sala za slučajeve većih nesreća,
 - b) sala za obdukciju umrlih od zaraznih bolesti,
 - c) anatomska sala sa 3 bazena (formalin),
 - d) frižider,
 - e) gasulhana-ženska,
 - f) gasulhana-muška,
 - g) dvije /2/ sale za obdukciju,
 - h) sala za opremanje umrlih sa dva stola,
 - i) prijemna sala,
 - j) ostava za opremu,
 - k) garderoba,
 - l) WC sa predprostorijama,
 - m) ostava za dezinfekciona sredstva,
 - n) prostorija za čistačicu,
 - o) ostava za nečistoće,
 - p) kancelarija ljekara-patologa,
 - q) kancelarija rukovodioca,
 - r) prostorija za dežurne,
 - s) prostorija za rodbinu,
 - t) ostava za ostala sredstva,
 - u) lift za vozilo.
- (3) Upravljanje i održavanje centralnom mrtvačnicom vrši «Upravitelj».
- (4) «Upravitelj» mora obezbijediti smještaj umrlih lica u centralnu mrtvačnicu.
- (5) Pod smještajem umrlog lica podrazumijeva se:
 - a) smještaj u rashladne komore,
 - b) po potrebi balzamovanje tijela,
 - c) oblačenje i umotavanje u čaršaf,
 - d) polaganje umrlog u sanduk ili tabut,
 - e) ako je potrebno letovati limeni uložak u sanduku,
 - f) kompletiranje pogrebne opreme,
 - g) iznošenje umrlog sa pogrebnom opremom iz centralne mrtvačnice do specijalnog vozila, za prevoz.
- (6) Svi umrli na području Kantona Sarajevo prije sahrane moraju biti dopremljeni i smješteni u centralnu mrtvačnicu.

Član 44.
(Preuzimanje i prevoz umrlog)

- (1) Preuzimanje i prevoz umrlog iz centralne mrtvačnice, može vršiti i svako drugo pravno lice, koje je registrovano od nadležnog organa za obavljanje pogrebne djelatnosti uz odgovarajuću dokumentaciju.
- (2) «Upravitelj» je dužan, uz saglasnost Osnivača, sa kliničkih centara u Kantonu Sarajevo, specijalnim vozilom, preuzeti i prevesti umrle sa kliničkog centra do centralne mrtvačnice uz odgovarajuću dokumentaciju.

Član 45.
(Dezinfekcija vozila i mrtvačnice)

«Upravitelj» ili «Pravno lice» je dužno nakon prevoza, preuzimanja, zbrinjavanja i opremanja umrlog izvršiti dezinfekciju vozila i mrtvačnice.

Član 46.
(Mrtvozorstvo)

- (1) Utvrđivanje uzroka smrti (prirodna/nasilna), vrši isključivo nadležni ljekar – patolog.
- (2) Izdavanje potrebne dokumentacije u vezi uzroka smrti (Potvrda o smrti), je isključivoj nadležnosti ljekara – patologa.
- (3) Bez izdate potrebne dokumentacije ili odobrenja ljekara-patologa, «Upravitelj» ili drugo pravno ili fizičko lice, ne smije poduzimati radnje preuzimanja i prevoza umrlog sa lica mjesta do centralne mrtvačnice.

V I I I – ISPRAČAJ I SAHRANA UMRLOG LICA

Član 47.
(Ispračaj i sahrana)

- (1) «Upravitelj» je dužno vršiti poslove vezane za ispračaj i sahranu.
- (2) Pri vršenju poslova iz stava 1. ovog člana radnici moraju biti odjeveni na način propisan općim aktom «Upravitelja».

Član 48.

- (1) Pod poslovima sahrane podrazumijeva se:
 - a) iskop groba (obično, duplo, trojno),
 - b) ručni odvoz viška zemlje, utovar na kamion i prevoz na gradsku deponiju,
 - c) zagrtanje groba,
 - d) obezbjeđenje uniformisanih nosioca pri sahrani,
 - e) dekorisanje odra i kapele,
 - f) izlaganje umrlog na odar,
 - g) obezbjeđenje kolica za prevoz umrlog do groba,
 - h) izlaganje u kapeli vijenaca i cvijeća,
 - i) ispračaj umrlog iz kapele,
 - j) organizovanje sprovoda,
 - k) spuštanje umrlog u raku,
 - l) zagrtanje i prvo formiranje groba,
 - m) polaganje cvijeća i vijenaca na grob,
 - n) obezbjeđivanje ozvučenja za govor pred kapelom i nad rakom,

- o) obezbjeđivanje sa CD-a muzike preko ozvučenja pri sahrani,
- p) ako na grobu ima nadgrobni spomenik, skidanje poklopne ploče i nakon sahrane vraćanje i u spomeniku obezbjeđivanje otvora za sahranu,
- r) nakon izvjesnog vremena skidanje starih vijenaca i cvijeća sa groba,
- s) konačno formiranje groba,
- t) dezinfekcija kapele.

Član 49.

(Zabrane pri sahranjivanju)

- (1) Zabranjeno je sahranjivanje umrlog bez sanduka, odnosno tabuta.
- (2) Umrli mora biti obučen najmanje u donje rublje ili zamotan u platno.
- (3) Zabranjene su pogrebne povorke, odnosno nošenje umrlog kroz gradske ulice.
- (4) Pogrebna povorka polazi od prostorije za vršenje posmrtnih obreda do grobnog mjesta.

Član 50.

(Kopanje, prenos, spuštanje i zatvaranje grobnog mjesta)

- (1) Kopanje grobnog mjesta, prenos umrlog do grobnog mjesta, spuštanje u grobno mjesto i zatvaranje grobnog mjesta vrši «Upravitelj».
- (2) Prenos posmrtnih ostataka umrlog od prostorije za vršenje posmrtnih obreda do grobnog mjesta i spuštanje u grobno mjesto mogu da vrše srodnici ili drugi građani ako je to običaj, samo u izuzetnim slučajevima.

Član 51.

(Sahranjivanje socijalno ugroženih umrlih lica)

«Upravitelj» je dužan da u saradnji sa Ministarstvom za rad, socijalnu politiku i raseljena lica Kantona Sarajevo vršiti sahrane socijalno ugroženih umrlih građana.

Član 52.

(Zbrinjavanje medicinskog i patološkog otpada, amputata i fetusa)

«Upravitelj» je dužan na zahtjev zainteresovanih lica vršiti sahrane medicinskog i patološkog otpada, amputata i mrtvorodne djece (fetusa).

Član 53.

(Saniranje oštećenja na susjednim grobnim mjestima)

«Upravitelj» je dužan da sva eventualna oštećenja na susjednim grobnim mjestima, koja su prouzrokovana prilikom sahrane, o svom trošku dovede u prvobitno stanje u roku od 15 dana od dana izvršenog pokopa.

I X – EKSHUMACIJA POSMRTNIH OSTATAKA

Član 54

(Ekshumacija)

- (1) Pod ekshumacijom posmrtnih ostataka podrazumijeva se:
 - a) obezbjeđenje adekvatne HTZ opreme,
 - b) dostava potrebne pogrebne opreme na mjesto ekshumacije ,
 - c) iskopavanje posmrtnih ostataka,

- d) ekshumiranje tijela,
- e) smještaj tijela u pogrebnu opremu,
- f) odvoz stare pogrebne opreme na deponovanje,
- g) dezinfekcija grobnog mjesta i okoline,
- h) zatrpavanje grobnog mjesta.

Član 55.

(Ekshumacija na zahtjev srodnika i zainteresovanih lica)

Ekshumacija posmrtnih ostataka može se izvršiti prije isteka roka iz člana 21. ove Uredbe na pismeni zahtjev srodnika i zainteresovanih lica o njihovom trošku i prenijeti u drugo grobno mjesto koje je od ranije obezbjeđeno.

Član 56.

(Ekshumacija iz urbanističkih i sanitarnih razloga)

- (1) Iz urbanističkih i sanitarnih razloga može se odrediti iskopavanje pojedinih grobnih mjesta odnosno grobnica ili cijelog groblja.
- (2) O namjeravanom iskopavanju mora se objaviti saopštenje u «Službenim novinama Kantona Sarajevo» i jednom od dnevnih listova dostupnih najmanje na teritoriji Federacije Bosne i Hercegovine. U ovom saopštenju pozvaće se srodnici i zainteresovana lica da se u roku od dva mjeseca od objavljivanja saopštenja izjasne o načinu ponovnog pokopavanja ekshumiranih posmrtnih ostataka.
- (3) Posmrtni ostaci ponovo će se pokopati na zahtjev srodnika na odgovarajući način, na trošak onoga za čiji se račun vrši ekshumacija. Ako se bliski srodnici u navedenom roku nisu izjasnili, posmrtni ostaci umrlih pokopaće se u zajedničko grobno mjesto odnosno grobnicu.
- (4) Na zajedničkim grobnim mjestima odnosno grobnicama označiće se imena pokopanih.
- (5) Kad se pokopavanje vrši u zajedničko grobno mjesto odnosno grobnicu, pozvaće se srodnici na način iz stava 2. ovog člana, da u roku od 30 dana preuzmu nadgrobne spomenike i ostale predmete od vrijednosti.

Član 57.

(Raspolaganjem grobnim mjestima nakon ekshumacije)

U slučaju kada se izvrši ekshumacija i prenos posmrtnih ostataka iz člana 55. ove uredbe grobno mjesto gdje je izvršena ekshumacija ostaje na raspolaganju pravnom subjektu i može se ustupiti zainteresovanom licu.

X – PRATEĆE USLUGE

Član 58.

(Prateće usluge)

Pod pratećim uslugama podrazumijeva se prodaja cvijeća, svijeća, opreme, prigodne ugostiteljske usluge i sl.

X I – SREDSTVA ZA OBAVLJANJE DJELATNOSTI

Član 59. (Sredstva za obavljanje djelatnosti)

Sredstva za upravljanje, održavanje i uređivanje grobalja obezbjeđuju se iz izvora propisanim Zakonom o komunalnim djelatnostima.

X I I – NADZOR

Član 60. (Nadzor)

- (1) Nadzor nad provođenjem ove uredbe vrši Ministarstvo prostornog uređenja i zaštite okoliša Kantona Sarajevo.
- (2) Inspekcijski nadzor nad provođenjem ove uredbe vrši Kantonalna uprava za inspekcijske poslove.

X I I I – KAZNE NE ODREDBE

Član 61. (Novčana kazna)

- (1) Novčanom kaznom u visini od 3.000 KM do 7.000 KM kazniće se pravno lice za prekršaj «Upravitelju», odnosno drugo «Pravno lice», ako ne postupi u skladu sa članom 6. ove uredbe.
- (2) Novčanom kaznom u visini od 1.000 KM do 2.000 KM kazniće se odgovorno lice u «Upravitelju», ako ne postupi u skladu sa članom 18. stav. 2. članom 19. stav 1. članom 21. članom 22. stav 3. članom 23. stav 1. članom 29. članom 30. stav 3. članom 33. članom 40. stav 1. članom 42. članom 45. članom 47. članom 51. 52 i 53. ove uredbe.
- (3) Novčanom kaznom u visini od 300 KM do 1.000 KM kazniće se pravno ili fizičko lice za prekršaj, ako postupi suprotno odredbi člana 16. stav 3., člana 17. stav 1. 2 i 4., člana 18. stav 1., članom 19. stav 2. članom 45. ove uredbe.

X I V – ZAVRŠNE ODREDBE

Član 62. (Stupanje na snagu)

Ova uredba stupa na snagu dana objavljivanja u «Službenim novinama Kantona Sarajevo».

Broj: _____
_____ 2010. godine
Sarajevo

P r e m i j e r
Vlade Kantona Sarajevo

Besim Mehmedić, s. r.